

TONG yulduzi

O'zbekiston Respublikasi bolalari va o'smirlari gazetasi

Gazeta 1929-yil 1-avgustdan chiqib boshlagan

2005-yil 28 mart - 3 aprel N:13 (66502)

Muassislar:

O'zbekiston Matbuot va
Axborot agentligi,
O'zbekiston Respublikasi
Xalq Ta'limi Vazirligi,
«KAMOLOT» Yoshlar
Ijtimoiy Harakati,
«SOG'LOM AVLOD
UCHUN» Hukumatga
qarashli bo'lmagan xalqaro
xayriya jam'armasi.



Assalomu alaykum qadrdonim «Tong yulduzi»! 11-sinfni bitirish arafasida senga ilk bor xat yozib, orzu va armonlarimiz bilan o'rtoqlashishga ahd qildim. Aksariyat

o'quvchilar senga maktub yo'llab maktablaridagi shart-sharoitlar haqida g'ururlanib yozishadi. Bizda esa maqtanishga arzigulik narsaning o'zi yo'q. Maktabimiz gazlashtirilmagan. Sport zali yoq, faollar zali, oshxona, fan kabinetlari ham yo'q. Sinf xonalarida birorta ham shkaf yo'q. Kompyuterlar haqida esa gap ham bo'lishi mumkin emas. Unda maktabingizda nima bor, deysizmi? Kelajakka katta umid va ishonch bilan yashaydigan o'quvchilar va bag'ri keng, mehri daryo ustozlarimiz bor. Ular sharoitlar yetarli emasligiga qaramasdan, bizga bor bilim va tajribalarini berib kelishyapti. Darslarini qiziqarli va maroqli o'tishga intilishadi. Ilmiy mudirimiz Soyib aka Fayziyev maktabimizdan 14 kilometr olisda yashaydilar. Ishlayman desalar, uylariga yaqin joylarda obod maktablar talaygina. Lekin u kishining bizga bo'lgan mehri boismi, har kuni velosipedda qatnab ishlaydilar. Shunday fidoiy, qalbi daryo ustozlar ishlaydigan maktabda yaxshi o'qimasdan

RAHMAT, NASRIDDIN AKAI

bo'larkanmi?..

Avvallari biz ancha olisdagi maktabga qatnardik. Yozda cho'lining issig'idan, qishda sovug'idan qiynalardik. Fermerlik bilan shug'ullanadigan hamqishlog'imiz Nasriddin aka Shahobovning bizga rahmi kelib, yangi maktab qurilguncha o'qib turishar, deya o'z hisoblaridan bir kichkina maktab binosi qurib berishga ahd qildilar. Qurilish uchun hamma narsa taxt bo'lgach, hamqishloqlarimiz hashar uyushtirib, astoydil mehnat qilishdi. Biz yuqori sinf o'quvchilari ham qarab turganimiz yo'q, qo'limizdan kelgancha kattalarga ko'maklashdik. Ko'pdan quyov qochib qutulmas, deganlaridek, ko'z ochib yumguncha mo'jazzina bilim maskanimiz ham qad rostladi. Futbol o'ynaydigan maydoncha tekislanib, darvoza ham tayyor bo'ldi. Shuning uchun bo'lsa kerak, 6 ta sinf xonasi, 3 ta parta joylashtirilgan o'qituvchilar xonasidagina iborat bo'lgan mo'jaz binomiz ko'zimizga koshonadek bo'lib ko'rinaradi.

Ancha olisdagi maktabga qatnash azobidan qutulgan biz o'quvchilarning quvonchimiz cheksiz edi. Qo'li ochiq, bag'ri keng inson Nasriddin akaning mehribonchiligiga javoban yanada yaxshiroq o'qishga, sport sohasida ham ko'plab yutuqlarni qo'lga

kiritishga astoydil intila boshladik. Tuman miqyosida o'tkazilgan fan olimpiadalarida muvaffaqiyatli qatnashib, faxrli o'rinlarni egallab qaytgan Sanjar Safarov, Suxrob Ko'kayev, Farida Oqiyeva, Mahbuba To'xtayeva, Nigina Shahobova kabi o'quvchilarimiz mitti maktabimiz dovrug'ini tumanga taratganlarida direktorimiz Islom aka Egamov, ilmiy mudirimiz Soyib aka Fayziyevlarning



Mana shu bino bitsa, yangi maktab bo'ladi. Lekin qachon?..

quvonganlarini bir ko'rsangiz edi. Sport sohasida ham maqtasa arzigudek yutuqlarimiz bor. Jismoniy tarbiya o'qituvchimiz Halim aka


Mo'minovning shogirdlari tuman miqyosida o'tkazilgan yengil atletikachilar bellashuvida 1-o'rinni olishga muvaffaq bo'lishdi. To'plagan metall parchalarimiz xirmoni 10 tonnadan oshib, tumanda birinchilikni qo'lga kiritdik. Bizda sharoitlar yo'q, deya qo'l qovushtirib o'tirganimiz yo'q. 12 kilometr uzorlikdagi 39-maktabga qatnab, kompyuter saboqlarini o'rganyapmiz. Dilorom Bobomurodova, Rohat Ro'ziyeva, Naim Nabotov, Mehriya Qutliyeva kabi jonkuyar ustozlarimiz

boshqarayotgan to'garaklarda kasb-hunar sirlarini egallayapmiz.

Hademay maktabni ham bitirib ketamiz. Afsuski, yangi, zamonaviy uslubdagi, barcha shart-sharoitlarga ega bo'lgan maktablarda tahsil olish bizga nasib etmadi. Odatda men tengi o'g'il-qizlar biror oliy o'quv yurtiga kirib o'qishni orzulashadi. Men esa qishlog'imda qolib ishlamoqchiman. Fermerlik bilan shug'ullanib, uka va singillarimiz uchun barcha sharoitlari yetarli bo'lgan zamonaviy maktab qurib berishni niyat qildim.

Shamsiddin YAXSHIYEV,
Buxoro viloyati,

Peshku tumani, Zakash qishlog'idagi 42 - maktabning 11 - sinf o'quvchisi.



Aziz bolajonlar! Sarlavhani o'qib hayron bo'layotgandirsiz-a? Aslo hayratlanmang, bu savol bilan sizga emas, mutasaddi amakilarimizga murojaat qilayapmiz. O'zbekiston Davlat tabiat muzeyi 1876 yilda tashkil etilgan bo'lib, bu yerda turli-tuman hayvonlar, noyob qushlar, jonivorlar, 380 ming nusxadagi noyob o'simliklarning ekspozitsiyalari

TABIAT MUZEYIGA QACHON BORAMIZ?..

saqlanmoqda. Ular orasida 100 yildan ortiq vaqt mobaynida yig'ilgan kapalaklar kolleksiyasi-yu «Qizil kitob»ga kiritilgan tabiat boyliklari ham bor.

Toshkentning Eski shahar qismi qayta ta'mirlanishi munosabati bilan 2004 yil 18 noyabrdan boshlab muzey faoliyati vaqtincha to'xtatilgan. Vazirlar Mahkamasining qaroriga asosan Sobir Rahimov tumani, A.Niyozov ko'chasi 1-uyga ko'chirilgan O'zbekiston Davlat tabiat muzeyi binosiga borganimizda, uning hamon faoliyat ko'rsatmayotganiga guvoh bo'ldik. Muzey direktori vazifasini bajarayotgan Zubaydullo aka Karimov buning sababini quyidagicha izohladilar: «Muzeyimizdagi asosiy ekspozitsiyalar bundan 30 yilcha avval yasalgan edi. Yangi muzey binosida ularni zamonaviy

holda yasashni mo'ljallayapmiz. Byudjet tashkiloti bo'lganimiz bois ko'p narsa moliyaviy ahvolimizga borib taqaladi...»

Ko'rinib turibdiki, o'quv muassasalaridagi sayohat darslari va tabiat muzeyida olib boriladigan mashg'ulotlar o'tilmayapti. O'quv yili tugashiga esa bor-yo'g'i ikki oycha vaqt qolgan bo'lsa.

Qariyb to'rt oydan ziyod turli xil karton qutilarga yoki maxsus moslamalarga joylashtirilgan ekspozitsiyalar, «qachon yorug'likka chiqarkanmiz» deya bir xonada biqinib turishibdi. Nabotot, hayvonot, dorivor giyohlar kabi sirli olam to'g'risidagi bilimlar barchani birdek qiziqtiradi. Nahotki tabiat mo'jizalaridan hayratlanadigan bolajonlar undan bebahra qolishsa?..

Muzeylar xalqimiz tarixini aks ettirib turgan joygina emas, ayni paytda o'sib kelayotgan avlodni o'z ota-bobolari o'tmishini o'rganishga, tabiat boyliklarini ko'z qorachig'idek asrab-avaylashga undaydigan dargoh hamdir.

Shunday ekan, O'zbekiston Davlat tabiat muzeyi ham tezroq ochilsa-yu tezroq sayohatchilar bilan gavjum makonga aylansa...

Jamila ERDONOVA.

«BIZNIKILAR OLIB KETISHADI»...

Yaqinda gazeta sahifasida bir maqolaga ko'zim tushib qoldi. Unda yozilishicha, o'quvchilar o'zlari tahsil olayotgan maktab kutubxonasini uylaridan kitob olib kelib, boyitisharkan. Bizda esa o'quvchilar kitob olib ketishadi. «O'qish uchun olishadi-da, keyin qaytarib topshirishar» deyayotgandirsiz-a!? Qaniydi shunday bo'lsa...

Keling, yaxshisi bir boshdan so'zlab bera qolay:

Tunov kuni maktab kutubxonasiga kirgandim. Kutubxonachimiz Go'zal opa bir sinfdoshimning kitob olib, qaytib topshirmagani haqida xafa bo'lib gapirib qoldilar.

-Hali o'qib bo'lmagandir-da, -dedim men ajablanib.

-O'rtog'ingning kitob olganiga hademay besh yil bo'ladi!!!

Haligi boladan so'rasam, vuy, haliyam yodlarida ekanmi, men u kitobni allaqachon yo'qotib yuborganman, dedi beparvo qo'l siltab.

Uning javobidan xafa bo'lib ketdim. Agar har birimiz bittadan kitob olib, qaytib topshirmasak, uka va singillarimizga nima qoladi? Ular kitobning ziyosidan qanday bahramand bo'lalilar?

Dilshod G'AFUROV,
Poytaxtimizdagi

169 - maktabning 9 - «A» sinf o'quvchisi.

Farg'ona viloyati, Rishton tumanidagi 32-umumta'lim maktabining 5-«A» sinf o'quvchilari yozadilar:

DO'STLIK - OLIY TUYG'U

Bitta ham haqiqiy do'sti bo'lgan odamga yashashning hojati yo'q, deb yozgan ekan taniqli faylasuf Demokrit. Do'stlik insonning eng oliy tuyg'usi hisoblanadi, menimcha. Birovlardan iymonib ayta olmagan sirlarini, ichki dunyosidagi his-tuyg'ularini va nihoyat muhabbatini odam o'z do'stiga ishonadi. U bilan sirlashib, maslahat so'raydi. Mening ham sinfimizda do'stlarim bisyor. Ularga qo'limdan kelgancha yordam berib, qo'llab-quvvatlab turishga harakat qilaman. Ba'zida uyga berilgan vazifalarni birga yechamiz, maktabga birga kelib, birga ketamiz. Do'stlarim ko'pligidan ba'zida faxrlanib qo'yaman. Chunki dunyoda kimdir pul uchun do'st bo'lsa, yana birov mansab, amal uchun do'st tutinadi. Amaldan ketdingmi, bo'ldi, har kuni kelib, eshigingni taqillatayotgan soxta do'sting ko'rinmaydi. Yoki pulingni cho'g'i kamaydimi, bas, do'stlarning safi ham torayaveradi. Men hayotda chin do'stim bo'lishini va u bilan bir umrga samimiy munosabatda bo'lishni xohlardim. Maktubimni taniqli shoirimiz Erkin Vohidovning quyidagi misralari bilan yakunlamochim:

*Do'st bilan obod uying, gar bo'lsa u vayrona ham,
Do'st qadam qo'ymas ekan, vayronadir koshona ham.*
Dostonbek KENJAYEV.

QAYSAR BOLA HARIDA ZAMONAVIY ERTAK

O'tgan zamonlarda emas, hozirgi zamonada, uzoq qishloqda bir oila yashar ekan. Oilada ota-ona va aka-singildan iborat, singil a'lochi, oqila va to'g'riso'z qiz ekan. Uning akasi esa, buning aksi, yerga ursa, ko'kka sapchiydiganlar toifasidan ekan. Bu bolaga ota-onaning, ustozlarning nasihatlari sirayam kor qilmabdi. Darslarda har xil shumliklar qilib, ustozlarni ham ranjitadigan bo'libdi. Shu tariqa u 5-sinfga ko'chibdi. Adabiyot ustozlari bolalarni odobli, ahloqli bo'lishga, ko'proq kitob o'qishga, she'rlar, g'azallar yod olishga o'rgata boshlabdi. Buni qarangi, sho'x bola tezda adabiyot darsiga mehr qo'yib, qo'liga kitob olib o'qiydigan, she'rlarni yod oladigan bo'libdi. Adabiyot o'qituvchisi tufayli sho'x bola tezda a'lochilar safiga qo'shilib qolibdi. Mana, ko'rdingizmi bolalar, kitob o'qish insonni nafaqat ma'naviy boy qiladi, balki uning fe'lga ham ijobiy ta'sir ko'rsatar ekan. Shunday ekan, kitob bilan do'stlashing, u sizni bizga dunyoning barcha sirlarini ochishga kalit bo'ladi.

Islom RASULOV.



EZGU MAQSADLAR YO'LIDA

Ma'lumki, bu yilni yurtboshimiz «Sihat-salomatlik» yili deb e'lon qildilar. Bu yurtboshimizning mamlakatimizning barcha aholisining sog'lom, baqquvat bo'lishlari uchun qilgan yana bir ezgu ishlaridir. Bunda aholining barcha ijtimoiy qatlamini himoyalash, tibbiy xizmatni yanada mukammallashirish, sog'lom avlodni voyaga yetkazish, ona va bolalikni himoya qilish, qishloq vrachlik punktlariga alohida e'tibor berish, zamonaviy tibbiyot asbob-uskunalarini ko'paytirish, umuman olganda, tibbiy xizmatni yuqori darajaga ko'tarish nazarda tutilgan. Biz bundan albatta xursandmiz. Qishlog'imizda yangi ta'mirdan chiqqan, zamonaviy asbob-uskunalar bilan jihozlangan qishloq vrachlik punkti fikrimning dalilidir. Aziz tengdoshim, sog'ligingiz o'zingizning qo'lingizda ekanligini bilasizmi? Siz har kuni tongda badantariya bilan shug'ullanib, sport bilan do'stlashsangiz, shaxsiy gigiyenaga amal qilsangiz, to'g'ri ovqatlanib, ish kuni rejangizni to'g'ri tuzib olsangiz, shifokor ko'rigidan tez-tez o'tib tursangiz, albatta kasallik sizdan qochadi.

Maftuna MELIMATOVA.

MAKTAB-BILIM O'CHOQ'I

Qishlog'imizning qoq o'rtasida joylashgan maktabimizda 1.400dan ortiq o'g'il-qiz tahsil oladi. Qurilganiga ancha bo'lgan bo'lsa-da, biz uni asrab-avaylaymiz. Chunki bu maktabda kelajakda bizning uka-yu singilchalarimiz ham o'qishlari kerak-da. Bizning kattagina kutubxonamiz ham bor. U yerda turli millat yozuvchi va shoirlarining kitoblari talaygina. Maktabimizda turli tadbiqlar, musobaqalar o'tkazilib turiladi. Barcha sinf o'quvchilari ularda faol qatnashib, mahoratlarini namoyish etadilar. Bizning sinfimiz obunada, temir-tergaklar yig'ishda, sinf ozodaligi-yu, davomat, maktabning barcha ishlarida oldinda borayapti. Yil yakunida «Eng tirishqoq sinf» nominatsiyasiga sazovor bo'lmoqchimiz.

Ro'zali ZAYLOBOV.



Kurtaklar yuz ochganda

AFIRGUL

*Kuzda niholin eksak,
Ko'karibdi bahorda.
Yumshatib suv taradik,
Erta turib nahorda.*

*Ochiladi rang-barang,
Sariq, oq-qizil gullar,
Chiroyi maftun star,
Zavqqa to'ladi dillar.*

*Qat-qat bo'lib rang-barang,
Bezani ham olibdi.
Husniga maftun bo'lib,
Bulbul bog'da qolibdi.*

SHIFOKORLARGA

*Shifo berib ming bir dardga,
Finim bilmas erta-kech.
Bemorlarning atrofida,
Parvonadir ketmas hech.*

*Egnidagi oq xalatday,
Dillari pok, ko'ngli oq.
Aritadi kasallikni,
Sog'lik bo'lsa ko'ngil chog'.*

Nigora MIRZAYEVA,
Qashqadaryo viloyati,
Shahrisabz tumani, Olmag'on qishlog'i.

SHE'RIYATGA OSHNO KO'NGIL

Qishloqqa borgan kunim nigohlari porlab turgan qizaloq qo'lida bir daftar bilan iymonibgina yonimga keldi. O'qib qaragam, ilk she'rlari ekan. Samimiy hislar bilan bitilgan satrlari diqqatimni o'ziga tortdi. Kamolaning eng katta orzusi sevimli gazetasi «Tong yulduzi» sahifalarida o'z ijod namunalari ko'rish. Qishloqdosh singlimning quvonchiga quvonch qo'shish maqsadida unga ijodiy parvoz tilab, she'rlarini tahririyatga olib keldim. U singari poytaxtdan olisda qalami charxlanayotgan bolajonlarimizga, barakali ijod qilavering, siz kattalar nazaridasiz, degim keladi.

Olimjon O'SAROV,

Oliy Majlis Qonunchilik palatasi deputati.



MENING SHOIRA SINGLIM

Tengdoshingiz Nigora Mirzayeva 10-sinfda tahsil olarkan. Bayram kuni Olmag'on qishlog'iga safarga borganimda uning otasi Do'stmurod aka qizini menga tanishtirar ekan, «qishlog'imizning shoirasi» deya kulib qo'ydi. Ro'paramda baland bo'lyi, istarasi issiq, ko'nglida ne sirlar yashirin Nigora menga umidvor nigohlarini qadagancha iymonibgina turardi. Uning she'rlarini varaqlab ko'rar ekanman, ona qishlog'imizdan yana bir ijodkor singlimiz yetishib chiqayotganidan boshim osmonga yetdi. Toshkentga keliboq uning ijod namunalari o'zi sevib o'qiydigan «Tong yulduzi» tahririyatiga olib keldim. Niyatim, qishlog'imizdagi yana bir iste'dodni o'z tengdoshlariga tanishtirish, unga oq yo'l tilashdir.

Muzaffar MIRZAYEV,
O'zbekiston Milliy Universiteti o'qituvchisi.



VATAN

*Men tug'ildim gulga to'lgan bir chamanda,
Femur bobom yashab o'tgan hur vatanda.
Oy - yulduzlar suhbat qurar osmoni bor,
Kim vatanin ona bilmas bo'ladi xor.*

*Posbonlari tinchligini saqlab turar,
Bog'larida gul ochilib xayol surar.
Quchoq'ingda yayrab o'egum vatanjonim,
Fark etmagum to oqarkan tanda qonim.*

OTAJONIM

*Kecha-kunduz ishlaysiz,
Bizni sevib xushlaysiz,
Kam qilmaysiz hech kimdan,
Kuzatasiz goh zimdan.*

*Assalom tilimizda,
Shodliklar dilimizda.
Mehribonim otajon,
Fido bo'lsin sizga jon.*

Kamola RAHMONOVA,
Samarqand viloyati, Bulung'ur tumani,
Besh og'a-ini qishlog'idagi
13- o'rta maktabning 8-«Ye» sinf o'quvchisi.

-Mabodo sehrli qalpoqchangiz bo'lganida nimalar qilardingiz?

-E, bildim buni nimaga so'rayapsiz. Xudoyberdi To'xtaboyevning «Sariq devni minib» asaridagi Hoshimjonga o'xshatayapsizmi? U kitobni o'n marotaba o'qib chiqqanman. 6- sinfni zo'rg'a bitirgan Hoshimjon sehrli qalpoqchasi bilan qanchalik yutuqlarga erishmasin, pushaymonlik girdobida qaytadan bilim olib, o'z kuchi bilan barcha ishni uddalashga majbur bo'ldi. Men ham o'z kuchimga ishonaman.

-Ko'pchilik bolalar kompyuterga qiziqishadi, siz esa aksincha shundaymi?

-Gapingiz to'g'ri, men ko'proq badiiy kitoblar o'qishga qiziqaman. Uyimizda 600 ga yaqin turli-tuman kitoblar bor. Ushbu kutubxonamizning menga tegishli qatorida 30 ga yaqin kitoblarim bor. «Qasoskorning oltin boshi», «Yulduzli tunlar», «O'n besh yoshli kapitan» kabi asarlarni qayta-qayta o'qishdan hech zerikmayman. Buvijonim Hurriyatxon aya «Sharq» nashriyotida ishlaydilar. Bolalar uchun chop etilgan yangi asarlarni uyimizga olib

Javohir KOMILOV, Shayxontohur tumanidagi xitoy tiliga ixtisoslashgan 59-maktabning 4-«A» sinfida a'lo baholarga o'qiydi. Oilaning to'ng'ichi. Ukajonisi Shohjahonga hamisha o'rnak bo'lgisi keladi.

kelib, hech erinmasdan ular xususida menga so'zlab beradilar. Qiziqarli

«LAOSHI» - USTOZ DEGANI

suhbatlarini tinglab, kitobga mehrim yanada ortadi.

-Olimpiadada birinchi o'rinni olish uchun nimalar qilish kerak ekan? Aytgandek, bellashuvda biroz xafa ham bo'libsizmi?

-Hech erinmasdan o'qish, kuchli bilimga ega bo'lish, tinmay izlanish lozim bo'larkan. 4-sinflar o'rtasida o'tkazilgan tuman olimpiadasida badiiy o'qish bo'yicha birinchi o'ringa sazovor bo'lganimdan qanchalik xursandligimni bilsangiz edi. Buning uchun sinf rahbarimiz Mahfuza Ismoilovadan, oyijonim, dadajonim va buvijonimdan juda minnatdorman.

Ulardan nimani so'rasam, menga bajonidil o'rgatishdi.

To'g'ri, olimpiadada 84-maktabdan kelgan men tengi o'quvchining xatti-harakatidan biroz ranjidim. Sababi, tengdoshim Muhammad Yusufning yozgan she'rini o'qib berib, hech ikkilanmasdan o'zim yozganman, dedi. Yolg'oni fosh bo'lganidan keyin qulog'igacha qizarib, so'z topolmay qoldi.

Birovni she'rini o'z zimni deydish adolatsizlikdir.

-Nimalarga qiziqasiz?

-Til o'rganishga qiziqaman. Hozirgi kunda xitoy va ingliz tillarini mukammal o'rganayapman. Ayniqsa, xitoy tili laoshi (ustoz)miz Sayyora opa bizga bu tildan qunt bilan saboq berib kelayotganligi tufayli, sinfimiz o'quvchilari hamisha

«4» va «5» baholarga o'qishayapti.

-She'rlar ham yozib turarkansiz?

-2- sinfdan boshlab she'rlar yozaman. Ularning ko'pchiligi hajviy she'rlar. Bolalik, do'stlik, inoqlik haqida yozgim keladi.

Tengdoshlarimga sevimli gazetam «Tong yulduzi» orqali o'zim yozgan she'rimni tuhfa qilmog'chiman.

MAKTAB BAG'RIDA

Chalinadi qo'ng'iroq,

Maktabga chorlab bizni.

Darslarda ko'p o'rgandik,

Buyuk tariximizni.

Fanimizda oqqan qon,

Femur bobom qonidir.

Gerbu, bayroq ramz bo'lsa,

Qomus -Vatan jonidir.

Rahmat Sizga ustozim,

Ko'rsatdingiz to'g'ri yo'l.

Shuning uchun doimo,

Ko'ksimizda ikki qo'l.

Javohirning kelajakdagi orzusi jurnalist bo'lish. Buning uchun u astoydil harakat qilmoqda. So'zi bilan ishi bir bu tengdoshingizga niyatlaring albatta ijobat bo'lsin, deymiz.

Mohinur HAYDAROVA suhbatlashdi.



Aziz bolajonlar, mana, 3-chorak ham tugadi. Endi ta'til kunlarida bo'sh vaqtingiz ko'p bo'ladi. Agar undan unumli foydalanmasangiz, keyin pushaymon bo'lishingiz mumkin. Keling, hozir ba'zi tengdoshlaringiz bo'sh vaqtlarini qanday o'tkazayotgani haqida bilib olaylik.

RANGLAR JILOSI

Men Sitora Hazratova 6-«A» sinf o'quvchisiman. «Tong yulduzi» gazetasini har bir sonini intiqib kutaman. «Mening bo'sh vaqtim» ruknini tashkil qilingani ayni muddao bo'ldi-da. Men bo'sh vaqtlarimni rasmlar chizish, she'r o'qish, chiroyli ko'ylaklar modellarini yaratish bilan o'tkazaman. Rasm chizishda ko'proq ranglarni ishlatishga harakat qilaman. Chunki rasmda turli ranglar jilolanib tursa, u yanada jozibaliroq va chiroyliroq ko'rinadi. Bundan tashqari, menga ona tili va adabiyot fanlari juda ham yoqadi. O'tgan sonlaringni birida men chizgan rasmlar chiqqan edi. Bundan yana ham ilhomlanib, chiroyli rasmlar chizdim va yana senga yuboryapman. Bu haqda do'stlaringim fikrlarini bilmoqchi edim.

Navoiy viloyati, Navbahor tumanidagi A.Firdavsiy nomli 5-maktab o'quvchisi.



TARJIMON BO'LAMAN

Men chet tillarida ravon so'zlashganlarga juda havas qilaman. Shuning uchun ham ingliz tilini mukammal o'rganishga bel bog'ladim. Hozir ingliz tilida yozilgan monologlar, matnlarni mustaqil tarjima qilishga harakat qilayapman. Intilganga tole yor, deyishadi.

Mening ham bu intilishlarim zoye ketmaydi, degan umiddaman. Bu yil bitiruvchi sinf bo'lganimiz uchun ham boshqa sinfdoshlarim bilan birga imtihonlarga tayyorgarlik ko'rayapmiz, xullas, bo'sh vaqtimiz deyarli yo'q.


Sevara G'YOSOVA, Toshkent viloyati, A.To'laganov nomli 7-umumta'lim maktabining 10-sinf o'quvchisi.



GO'ZALLIKKA OSHNO QALBLAR

Mening bo'sh vaqtim

O'quvchilarning bo'sh vaqtlarini to'g'ri tashkillash maqsadida, ularning ongi va qalbida g'oyaviy bo'shliq paydo bo'lishining oldini olishda, mustaqil fikrlashga, mustahkam e'tiqod va dunyoqarashga ega bo'lgan, yuksak ma'naviyatli yoshlarni tarbiyalashda to'garaklarning muhim o'rni bor. Bizning maktabimizda bir nechta to'garaklar muntazam ishlab turibdi. Jumladan, «Mohir qo'llar», «Chevar qizlar», «Aviamodelchilar» to'garaklari doimo o'quvchilar bilan gavjum. 5 yildan buyon faoliyat ko'rsatib kelayotgan «Yosh gulchilar» to'garagiga qalbi go'zallikka, yaratuvchanlikka, ezgulikka oshno bo'lgan 40 ga yaqin o'quvchilar a'zo bo'lishgan. Go'zallik, ezgulik ishonch va muhabbat ramzi



bo'lgani uchun xalqimiz uni azaldan sevib, ardoqlaydi. Yal-yal yonib turgan gullarni ko'rib, kishining bahri-dili ochiladi, kayfiyati ko'tariladi. Sinf xonalarimiz, yolaklarimizda turli gullar juda ko'p. Gulchilik to'garagining o'zida 35 turda 500 dan ortiq anvoyi gullar gurkirab ochilib yotibdi. Har yili maktabimizda gul bayrami o'tkazish urf bo'lib qolgan. Bundan tashqari, maktabimiz atrofidagi yer maydonchalari sinflarga taqsimlab berilgan. Gulzordagi gullarimiz barchaning ko'zini quvnatib turadi. Siz ham maktabimizga bir kelib, gullarimizning go'zalligidan bahramand bo'ling.

Ra'no JUMANIYOZOVA, Xorazm viloyati, Urganch tumanidagi 22-o'rta maktabning oliy toifali o'qituvchisi, to'garak rahbari.



Sog' yurak - tog' yurak

Kelajak qanotlari



SHOHJAHON JAHON KEZZIN

Shohjahon kichik jussali, ko'zlari kulib turadigan quvnoq bola. 7 - sinfda o'qiydi. Kattalardan, nega mening ismim Shohjahon, deb so'rayveradi. Onasining javobi esa tayyor: «Sen jahon kezishing, el ko'zidagi bola bo'lishing kerak-da».

-Buning uchun nimalar qilishim kerak?

-Hammani havasini keltiradigan bola bo'lishing kerak.

Shohjahon ismiga monand yigit bo'lish uchun astoiydil harakat qila boshlanadi. Dastlab erta turishni odat qildi. Ertalabki badantarbiya mashqlaridan hecham erinmadi. Maktabda a'lochilar safidan o'rin oldi. Oiladagi sportga

jiddiy qiziqish bolakayda mehr uyg'otdi. Sharqona yakkakurash turlaridan biri-muay-tay sportiga qiziq boshladi.

Bu mehr uni tumandagi 26-sport maktabiga yetakladi. Omadni qarangki, unga muay-tay to'garagi rahbari, viloyat muay-tay federatsiyasi bosh murabbiysi, xalqaro toifadagi hakam, kikkboxing va sambo turlari bo'yicha sport ustasi Qurbonmurod aka Qurbonov murabbiylik qila boshladi.

Dastlab badantarbiya mashqlaridan ancha qiynaldi. Tinimsiz

musobaqalarga tayyorlanishlar hamma-hammasi sportchini chiniqtirib borarkan. Murabbiysi aytganidek, sport- dovyuraklar, mardlar maydoni ekanligi rost ekan.

Sinfdozlari bu o'quvchimga havas qiladilar. Chunki uning bo'ynida shoda oltin medallari bor.

Bugun sinfimiz faxri bo'lgan o'quvchimga sport olamidagi murabbiylari Shahriyor aka Hasanov va Qurbonmurod akalarning ham ko'ksilari iftihorga to'lmoqda. Shohjahonga sport maydonlarida omad yor bo'lsin deya tilak bildiramiz. Uning safini sinfdosh do'stlari ham to'ldirib boraversinlar.

Saodat RASULOVA,

Buxoro viloyati, Olot tumanidagi 10 - maktabning boshlang'ich sinf o'qituvchisi.

NIKOLAYEV TURKIYAGA NEGA KETDI?

Qiz bola bo'lsam-da, millionlar o'yini bo'lmish futbolga befarq emasman. Jahonning va yurtimizning mashhur to'purarlariga havasim baland. Ular haqidagi turli mish-mish gaplarga quloq solmay iloj yo'q. Ayniqsa, o'yin davomida futbolchilarning olgan jarohatlari va tortayotgan azoblarini o'ylab ham siqilaveraman.

Futbol olamida

Yaqinda «Paxtakor» hamda milliy terma jamoamizning mahoratli hujumchisi Aleksey Nikolayev Turkiyaga jo'nab ketibdi va yangi jamoada mashg'ulotlarni boshlab yuboribdi. Xullas,

Nikolayevning nega «Paxtakor»dan ketganligiga tushuna olmayapman. Axir ular jamoa sharafiga munosib himoya qilayotgan edilar-ku? Qosimov ham hozir boshqa jamoada. Qaniydi, yurtimizning ko'zga ko'ringan futbolchilari faqat o'z jamoamiz sharafiga himoya qilsalar... Balki tajriba almashtirishayotgandir, deysizmi? Unday bo'lsa, quvonardim.

Xurshida BOYMIRZAYEVA.

Gazetamiz sahifalanayotgan vaqtda biz futbol federatsiyasidan ajoyib xushxabar oldik. Xorij shartnomasi imzolanmagan futbolchimiz yana «Paxtakor» jamoasiga qaytibdi.



Mahallamizda sumalak qilishdi.

Katta doshqozonda qaynayotgan sumalak hidi hammani o'ziga chorlardir. Bir yonda yoshu qarilarning gurungi, bir yonda esa sho'x bolakaylarning o'yin-kulgusi avjida.

Islom betoqat ko'rinadi. O'rtoqlari o'yiniga ham qo'shilgisi yo'q. Birov chaqirayotgandek uyiga tez-tez kirib chiqardi.

Darvoqe, hikoyamiz qahramoni Islombekni sizlarga tanishtiray: u o'g'lim bilan tengdosh. Bu yil 1- sinfni tamomlayapti. Nogiron otasi bilan 6-7 yildan beri yolg'iz yashayapti. Onasi tashlab ketgan. Sababi, dadasi nogiron bo'lib qolgani ekan. O'zi qorachadan kelgan, qotmagina bola. Ko'zlariga hecham botinib termula olmayman. Uning ko'zlarida g'am bor. Yaxshiyamki buvijoni, ammalari, amakilari unga parvona. Yolg'izlatib qo'yishmaydi.

Sumalakka ham buvisi bilan chiqqan. Xuddi undan ham ayrilib qolayotgandek, buvisining yonidan jilmaydi. Buvisini turtib: «bitta kovlaychi» deydi sekingina.

Men uni nazardan

Niyat

engashib bir nimalar deydi. Tasdiq ifodasini olgach, uyiga yuguradi. Sal o'tmay chiroyi ochilmasdan yana Xolbeka xola yonida paydo bo'ladi. Sumalakka termuladi.

MEHR TAOMI

U z o q termuladi. Hatto buvisiga-da, bir gap aytgisi kelmaydi.

Islom bilan gaplashgim keldi. Kel-chi bu yoqqa, deb imlayman. Qo'limdagi kapgimi



unga tutqazaman. U esa, rahmat, deya og'iz qimirlatadi. Yong'oq-yong'oq bo'lib qaynayotgan bu mo'jizaviy taomdan ko'z uzmay, uni kavlay boshlaydi. Ma'yus ko'zlari piriqaydi. Lablari pichirlaydi. Ammo bunga hech kim e'tibor bermaydi. Men esa

qochirgim kelmasdi.

Buvisining qulog'iga qaytsinlar, dadam tuzalib ketsinlar».

uning dilidagini ko'zlaridan uqib olaman: «Oyim bag'rimizga qaytsinlar, dadam tuzalib ketsinlar».

Sevinarmikan deb qilgan ishimdan u quvonmadi ham. Boshqa bolalarni qozon atrofiga yaqinlashtirmaganimiz sabab, sumalak kavlashga qiziquvchi bolakaylar: «Islomga berdingiz-ku?» deya g'imirlab qolishdi. O'rtoqlariga bir so'z demagan bu g'amgin bola sekingina uyiga kirib ketdi.

Hech qancha o'tmasdan ko'zlari sevinchga to'lgandek yana qaytib chiqdi. Buvisi tomon oshiqadi. Sezgir buvijoni nevarasi so'zlamasdan, yangilikni biladi. Uning yuz-ko'zlaridan o'padi.

«Aytdim-ku, senga oyijoning baribir qo'ng'iroq qiladi, deb». Islom yana sumalakka termuladi. Negadir bu safar yuzlarida bir muncha quvonch balqardi. Axir uning onasi bugun o'g'lini tug'ilgan kuni bilan telefon orqali bo'lsa ham tabriklagandi-da..

Islomga yana boqaman. Nazarimda, sumalakning yoqimli hidi uning bo'sh qalbini to'ldirayotgandek edi...

Gulchiroy ASQAROVA,
Samarqand viloyati,
Kattaqo'rg'on tumanidagi
97-maktabning
adabiyot o'qituvchisi.

«ZULFIYAXONIM QIZLARI»
BILAN UCHRASHUV

Yaqinda poytaxtimizning Chilonzor tumanidagi 126-maktabda sevimli shoiramiz Zulfiya tavalludining 90 yilligiga bag'ishlangan kecha bo'lib o'tdi. Ushbu tadbir o'quvchilar qalbidan munosib o'rin egallashi shubhasiz. Shoira go'zal, nafis she'rlari, uning hayot yo'li haqidagi maroqli hikoyalar kecha qatnashchilari tomonidan yuksak mahorat ila tarannum etildi. Ayniqsa, tarix fani o'qituvchisi bo'la turib san'atga astoydil mehr qo'ygan Shoira opa Xudoberdiyevaning chiqishlari yig'ilganlarga juda manzur bo'ldi. Kechaga tuman Xotin-qizlar qo'mitasi va Xalq ta'limi bo'limidan ham mehmonlar taklif etildi. Bahomi, Navro'zni, go'zallikni tarannum etuvchi kuy va qo'shiqlarga gimnastikachi qizlarning nazokatli chiqishlari hamohang bo'ldi. Sahnaga «Qizlar davrasi», «O'zbekim o'g'lonlari» nomli ko'rsatuvlar orqali barchamizga yaxshi tanish bo'lib qolgan dilbar qizlarimiz - Zulfiya nomidagi Davlat mukofoti sovrindorlari chiqib kelishganda, zalda yangragan qarsak ovozi bir eshitsangiz edi...

Tadbir

Biz Zulfiyaxonimning betakror adabiy merosi bilan doimo faxrlanamiz. Men ham ushbu tadbirda qatnashdim. Undan bir olam zavq va taassurot olib qaytar ekanman, kechada boshlang'ich sinf o'quvchilari qatnashmaganlaridan biroz ranjdim. Axir bunday tadbirlarni o'tkazishdan maqsadimiz buyuk shoiramizni kichikintoylarga ham tanishtirishdan, u haqida bilganlarini yanada boyitishdan iborat-ku axir, shunday emasmi?



Ma'mura MADRAHIMOVA.

Bu voqea o'tgan yili kuz faslida bo'lgan edi. Bir kuni sinfdoshim Valijon bilan garov o'ynadik. Qishlog'imizning bir chekkasida tashlandiq uy bo'lib, u yerga odam tugul, mushuklar ham borishmasdi. Nima uchun bunaqa ekanligini dadamdan

so'raganimda, u yerdan allaqanday sharpa

yashashini, uyning yaqiniga borgan kishini omon qo'ymasligini aytgandilar. Xullas, Valijon bir kuni menga:

-Agar o'sha uyga kirsang, senga istagan narsangni olib beraman, - dedi. Nima olib ber desammikin, deb o'ylab-o'ylab unga do'kondagi radio-magnitofonni ko'rsatdim. Buni qarangi, u ikkilanmay rozi bo'ldi. Endi o'sha uyga bir marta kirib chiqsam, bas. Ikkalamiz bir kunni belgilab, g'ira-shirada uchrashdik. Valijon: - Men shu yerdan turaman, sen uy ichkarisiga kirib, mana bu ro'molchani ustuniga bog'lab chiqasan, - dedi. Men uning qo'lidagi dastro'molni oldim va buzilgan, singan taxtalarning ustidan qo'rqa-pisa yurib, ichkariga kira boshladim. Uyga yaqinlasharkanman, yuragim taka-puka bo'lib ketardi. Nazarimda, yuragimning urishi butun qishloqqa tarqalayotgandek... Shu payt «qars» etgan ovozdan cho'chib, atrofga alangladim. G'ira-shirada hech narsani ko'rib bo'lmay, uyga uch-to'rt qadam qolgan edi. Men yana odimimni tezlatib, tezroq bu balodan

«KU-KU...»

qutulish uchun ostonaga qadam qo'ydim. Bir mahal ichkarida kimningdir sharpasini sezib qoldim. Oyoqlarim qaltirab, tilim kalimaga kelmay qoldi. Qo'limdagi dastro'molni ustunga endi olib borgan edim, orqamdan o'sha sharpa lip etib o'tdi. Men orqamga burildim. Sharpa meni ta'qib qilayapti, degan xayolda ustunni

paypaslay boshladim. Qo'llarim ustunga yetmay turib, kimdir qo'llarimni mahkam ushlab oldi. Yuragim qinidan chiqib ketayozdi va bor ovozim bilan baqirib yubordim. Dastro'mol qo'limdan tushib ketdi, oyoq -qo'lim titrar, nazarimda sharpa menga hozir xamla qiladigandek edi. Shu payt «Ku-ku...» degan ovozdan cho'chib tushdim. Ne ko'z bilan ko'rayki, qarshimda Valijon turar, «yutqazding», deya xaxolab kulardi. Meni esa holim o'zimga ma'lum, haligacha o'zimni tutolmasdim. Uyga bir ahvolda kelganimni ko'rgan oyim: «Senga nima bo'ldi?» dedilar. Men ularga bo'lgan voqeani aytib berdim.

-Dadang senga hazillashib aytganlar-da, u yerdan odam turmaganiga 5 yil bo'ldi. Gohida bolalar kirib o'ynab yurishadi-ku, seni qara-ya hech kim turmaydigan uydin qo'rqqaningni, - dedilar oyim. Qilmishimdan uyalib ketdim.

Ertasi kuni Valijon bilan do'konga kirib, radio-magnitofonni unga olib berdim.

Behzod AHROROV,
Toshkent viloyati, To'y-tepa
qishlog'i, 7-sinf o'quvchisi.



«YO'LBARS YURAKLI» ODAM

Qishlog'imizda No'mon aka degan kishi yashaydi. Basavlat, bo'ychan va keng yag'rinli bu kishidan ko'chamizdagi barcha bolalar hayiqib turadi. Bu kishi haqida juda ko'p gaplar yuradi. Emishki, ular bolalik davrlarida juda ko'p kasal bo'lib, yo'lbarsning yuragini yeb, oyoqqa turgan vaqt o'tib, shunday gavgdali kishiga aylanganmish. No'mon aka uncha-buncha narsalardan qo'rqqmas, polvonlikda esa ularning oldiga tushadigani yo'q edi. Bir kuni ularning o'g'li Burxon bilan gaplashib, men eshitgan gap rost yoki

yolg'onligini

so'radim. U

ham darrov

bu gapni dadasiga

yetkazibdi. Ertasi kuni Burxon

kelib, meni dadasi

chaqirayotganini aytdi.

Men qo'rqa-pisa ularning

uylariga bordim. No'mon

aka mendan: «O'sha

gapni qayerdan

eshitding?» - deb

so'radilar. Men,

odamlardan, deb nariroq borib o'tirdim.

- Qo'rqqama, beri kel, men senga bo'lgan voqeani aytib beraman, - dedilar kulib.

...Mening dadam ovchi bo'lganlar. Tog'larga borib, do'stlari bilan ov qilishni juda yaxshi ko'rganlar. Men bolaligimda juda nimjon va kasalga tez chalinadigan bola bo'lgan ekanman. Oyim meni hatto tashqariga olib chiqishga ham qo'rqqar ekanlar. Chunki darrov shamollab qolar ekanman-da. Bir kuni dadam toqqa sheriklari bilan ketadigan bo'lib qoldilar va meni ham o'zlari bilan birga olib ketmoqchi bo'ldilar. Oyim bunga hecham ko'nmadilar. Dadam bir so'zli, cho'rtkesar bo'lganliklari uchun meni

ham safarga olib bordilar. Tog'ning teparog'iga chiqqanimiz sayin meni nafasim siqilar, buni dadamga aytishga qo'rqqardim. Tepaga chiqib olgach, birdan nafas olishim ham yaxshilanib, o'zimni qushdek yengil his qildim. U yerda dadam o'rtoqlari bilan turli qushlarni, quyonlarni ovlab kelishdi. Tog'dan tushgach esa, bir o'rtoqlarinikiga kirib, o'sha yerdan dam oldik. Shunda uy egasi: «Bu yerdan shifobaxsh buloq bor. O'g'lingizga nahorda o'sha buloqning suvidan ichiring,

ko'ribsizki, uni tanimay ham

qolasiz», dedi. Erta tongda

uy egasi bilan o'sha

buloqqa bordik. Uning

suvidan icharkanman,

muzdekligidan tishlarim

sinib tushay dedi. Uyga

qaytsak, ular go'sht

pishirib o'tirishgan

ekan. Shunda bir kishi:

«Mana, o'g'lim,

kechagi otgan

yo'lbarsimizning yuragi.

Shuni yesang,

yo'lbarsdek kuchli,

qo'rqqmas bo'lasan», - dedilar. Bu

gapga hamma ishonadi. Aslida u

qo'chqorning yuragi ekan. Xullas,

shu gapdan keyin men

«yo'lbarsning yuragini yegan»

odamga chiqdim. Shu-shu bo'ldi-

yu, men hecham kasal bo'lmadim.

Bunga sabab toza tog' havosimi

yoki buloq suvimi, bilolmadim.

Mana, sog'-salomat, hatto

keragidan ortiqroq qomatli ham

bo'ldim. To'g'risini aytsam, kishi

mehnatda chiniqadi. Sen ham

mehnat qilsang, kam bo'lmaysan.

Shunday qilib, No'mon aka

ko'chadan o'tganlarida ulardan

hayiqmaydigan bo'ldim.

Zokir HOJIMURODOV,
Surxondaryo viloyati, Sherobod tumani, 9-sinf o'quvchisi.



Dilrabo DO'STOBILOVA,

Toshkent shahar, Yakkasaroy tumanidagi 118 - maktabning 7 - «A» sinf o'quvchisi.

Ta'til kunlarining birida buvimnikidan qaytayotgandik. Baland-baland tog'larni zavq bilan tomosha qilib ketayotgandim, ko'zim kuchukchalar sotayotgan bolalarga tushib qoldi. «Dadajon, menga ham kuchukcha olib bering», deya xarxashani boshladi singlim. Noiloj qolgan dadam bitta kuchukchani sotib olib berdilar. Uni mening o'rindig'imning tagiga joylab, yo'lda davom etdik. Hali uyga yetib kelmasdanoq kuchukchaga qanday nom qo'yishni o'ylay boshladik. O'zaro maslahatlashib, bokschi Mayk Taysondek kuchli bo'lsin, deya uni «Tayson» deb nomladik.

Yo'l charchog'i kuchlilik qilib uxlab qolibman. Turib qaragam, Tayson mening ustimda uxlab yotibdi...

Nihoyat, uyga yetib keldik. Tayson tinmay u yoqdan bu yoqqa yugurar, uka va singillarim esa uning ortidan qolishmasdi. Kuchukcha kun sayin o'sib borar, bizning esa unga mehrimiz tobora ortib

borardi. Uyimizga kelgan mehmonga osilib erkalanar, oyoq kiyimlarini uyning turli burchaklariga yashirib qo'yardi. Mehmonlar ketar chog'ida hammamiz zir yugurib, uning oyoq kiyimlarini qidirardik. Tayson esa xuddi «bopladimmi?» degandek o'ynoqlab atrofimizda parvona bo'lardi. Zerikkanida tashqariga chiqib, sayr qilib kelar, so'ng oyoqlari bilan eshikni qattiq taqillatardi.

Bir kuni uning eshik taqillatayotganini kuzatib turgan bir yo'lovchi: «Kuchugingizga endi eshik qo'ng'irog'ini bosishni o'rgatinglar», deb ketdi.

Bir kuni Tayson aylangani chiqib ketdi-yu, uyga qaytib kelmadi. Biz esa uning sho'xliklarini, ajoyib qiliqlarini unutilmayapmiz. Eshik «tiq» etsa, Tayson qaytdimikan, degan ilinjda yuguramiz.

Hayotimizni radio, televideniyesiz, gazeta va jurnallarsiz tasavvur qilib bo'lmaydi. Ular orqali namoyish etilayotgan ko'rsatuv va eshittirishlar ommabop bo'lib, har doim ham o'z muxlislarini topayaptimi?

«Yoshlar» radiosi sharhlovchisi Sevara HOSHIMOVA bilan qilgan suhbatimiz aynan shu mavzuda, shuningdek, bolalar ruhiyati, psixologiyasi haqida bo'ldi:

deb.

O'zim ham ikki o'g'ilning onasiman. Katta o'g'lim maktabda faqat a'lo baholarga o'qirdi. Hozir litseyda tahsil olyapti. Ayrim «sotka» ko'targan, yoshlikni faqat o'ynab-kulish davri deb biladigan tengdoshlarining ta'siri bo'lyaptimi, o'qishlari biroz pasayganidan xavotirdaman. Ozmi-ko'pmi hayot tajribamdan shu narsaga amin bo'ldimki,

berishlari lozimligini unutib qo'yishayotgandek, nazarimda.

-Maktabdagi muhabbat mavzusiga qanday qaraysiz? Chunki biz istaymizmi, yo'qmi, maktab davrida bu tuyg'u qalblarimiz «mehmon»i bo'ladi.

-Ijobiy qarayman. Chunki bu dunyodagi eng samimiy, eng beg'ubor tuyg'uni juda qadrlayman. Sevish, sevilish yoshlikka yarashadi, qachonki u odob-axloq doirasida bo'lsa. Bu narsa esa ko'p jihatdan biz kattalarga ham bog'liq.




«YOSHLAR»NI YOSHLAR TINGLASHADIMI?

Sevara opa, qator yillardan buyon «Yoshlar» radiosida ishlar ekansiz, qolaversa, o'zingiz ham onasiz. O'smirlar psixologiyasiga oid fikrlaringizni bilmoqchi edik. Ular tarbiyasi xususidagi maslahatlaringiz bilan o'rtoqlashsangiz.

-Maslahat berish oson, lekin unga amal qilish ancha mushkul vazifa. Farzandiga to'g'ri tarbiya berish, ularni komil inson qilib voyaga yetkazish har bir ota-ona orzusi. Shu maqsadda ularga nasihatlar qilishadi, hayot tajribasidan kelib chiqqan holda yo'l-yo'riqlar ko'rsatishadi. Lekin nazarimda bu nasihatlar uyning ichida qolib ketayotgandek, o'smirlarga ota-onaning emas, ko'chadagi tengdoshlarining ta'siri ko'proq bo'layotgandek, «Qush uyasida ko'rganini qiladi» degan naqlga amal qilinmayotgandek. Keksalarimiz bejiz aytishmagan-ku, bola tarbiyasiga jiddiy e'tibor beringlar, chunki uning mevasini achchiqmi, shirinmi, o'zingiz totasiz,

farzandlarga nisbatan o'ta qattiqqo'llik bilan hech narsaga erishib bo'lmay ekan. Oiladan o'ziga do'st topa olmagan o'smir uni ko'chadan izlashga majbur bo'larkan. Yaqin do'st, sirdosh dugona bo'la olsakina, ular qalbiga yo'l topa olamiz. Kasbim taqozosi bilan ko'p joylarda boraman, turfa dunyoqarashli insonlar bilan muloqotda bo'laman. Uzzu-kun bozorda yuradigan ayrim



ayollar bilan suhbatlashganimda, shu bolalarni birovdan kam kiydirmaslik, yedirmaslik uchun yuribmiz-da, deyishadi. Ammo ular farzandlariga faqat moddiy emas, ma'naviy boylik ham

O'smir yoshidagi o'g'il-qizlarimizdan boshqa mavzular kabi sevgi bobidagi maslahatlarimizni ham ayamsligimiz lozim. Gazetangiz orqali «Maktabdagi muhabbat» sahifasining berib borilishini ham o'rinli deb hisoblayman. Sahifadagi onalar, ustozlar hamda ruhshunoslarning chiqishlari, pandu-nasihatlar, o'gitlari, o'smirlarning bu xususdagi rang-barang fikrlari o'quvchi uchun ma'lum ma'noda maslahatchi vazifasini ham o'taydi, deb o'ylayman. Odamning yoshi o'tgan sari, bolalik xotiralari, ayniqsa, o'smirlikdagi hayajonli voqea-hodisalar bot-bot yodga tushaverarkan. Istardimki, hech kim ana shu xotiralaridan uyalib yurmasin...

-«Yoshlar» kanalini yoshlar tinglashadimi?

-To'g'risini aytsam, hammasi emas. Afsuski, ko'pchilik yoshlarimiz yengil-yelpi mavzularga o'rganib qolishgan. Bizni ko'proq o'rta yoshli insonlar tinglashadi.

-Xususiy radiolar haqidagi fikrlaringiz?

-Ham ijobiy, ham salbiy. Ijobiyligi shundaki, tinglovchiga tanlash imkoniyati berilyapti. U o'zining didi, dunyoqarashiga mos eshittirishlarni tinglashi mumkin. Qolaversa, kanallar ko'paygan sari, raqobat ham o'sib boraveradi. Raqobat bor joyda o'sish, rivojlanish, yangilik sari intilish bo'ladi.

Salbiy jihati shundaki, ayrim kanallar orqali taralayotgan yengil-yelpi mavzudagi eshittirishlar tinglovchining saviyasini pasaytirib yuboryapti. Masalan, «Sezam» radiosi orqali berilayotgan eshittirishlar menga umuman yoqmaydi. «Navro'z» yoqadi. Chunki unda bugunning nafasi sezilib turadi. Uning boshlovchisi Muzaffar Mirzabekovning, «Vodiy sadosi»dagi Feruzabonu, Qizlarxon Xo'jayevalarning boshlovchilik qobiliyatiga, muomala madaniyatiga tan beraman. Ular ayrim boshlovchilar kabi yoshlarga yoqarkanman, deb kattalarning g'ashiga tegadigan jargon gaplarni takrorlayvermaydilar. Imkon berildi deya, oldi-qochdi gaplarni gapiravermaydilar. Bu mening shaxsiy fikrim, albatta.

-Hozirgi kunda ko'pchilik ota-onalarimiz farzandlariga juda yoshlik chog'laridanoq til o'rgatishga, kompyuter saboqlarini egallatishga harakat qilishyati. Yana, ularni sport, raqs va boshqa turli to'garaklarga yetaklashadi. Bu holni qanday baholaysiz?

-Men bunday ota-onalarni hecham tushuna olmayman. Namuncha shoshishmasa? Axir har bir davrning o'z gashti bo'ladi-ku. Ayniqsa, bolalikdek beg'ubor, betakror davrning zavqi bo'lakcha. Bolajonlarimiz bolalik gashtini bemalol surishlari tarafdoriman. Qolaversa, farzandlarimizni qancha barvaqt o'qishga, o'rganishga undasak, ulardagi ishtiyoq shunchalik tez so'nadi, deb o'ylayman va bu holatga bir necha bor



o'zim guvoh bo'lganman. Har narsaning o'z vaqtida bo'lgani yaxshi-da.

-Gazetamiz muxlisleri orasida radioboshlovchilikni orzulaganlari ham talaygina. Ularga tilak va maslahatlaringiz.

-Hozirdanoq puxta bilim olishsin. Dunyoqarashlarini kengaytirib, muomala madaniyatini o'rgana borishsin. Yana, suhbatdoshi qalbiga quloq tuta bilishni o'rganishsin. Muxlislarning savollariga javob topa olmay qolishdan xudo asrasin.

-Mazmunli suhbatingiz uchun tashakkur.

Feruza JALILOVA
suhbatlashdi.



HIMMATLILAR BOR BO'LSIN

Abdug'ani aka Tojiboyevni Zangiota tumanidagi 36-o'rta maktab o'qituvchilari, o'quvchilari hamda ularning ota-onalari «Himmatli ustoz» deb ataydilar. Bunga asos bor albatta. 17 yildan buyon ana shu maktabda o'quvchilarga ijtimoiy fanlardan saboq berib kelayotgan Abdug'ani aka ikki yil avval bir savobli ishga qo'l urdi. Kam ta'minlangan oilalarning iqtidorli farzandlarini qo'llab-quvvatlash, rag'batlantirish maqsadida oylik maoshini ularga stipendiya tariqasida tarqatib berishga ahd qildi. Mana, ikki yildirki ana shu xayrli ishni davom ettirib kelyapti. Maoshi taqsimotini «pedkengash» ixtiyoriga topshirib qo'ygan ustozdan o'quvchilar, ayniqsa, ularning ota-onalari behad mamnun bo'lishyapti. O'z navbatida shogirdlari ham uning himmatiga javoban yanada yaxshiroq o'qishga intilmoqdalar.

ASALCHI amaki.

NIHOLDA HAM BOR XAYOL

Razzoq IBROHIM

(Davomi. Boshi o'tgan sonlarda).

Vozgi ta'til boshlansa,
Menga juda qiyin-da.
Mol boqaman uzdu-kun,
Yurib yaylov, surgunda.
Mollar soni to'qqiz-o'n,
Ba'zan undan oshadi.
Brigadir doim goh-goh
Kolxoz molin qo'shadi.
Xo'mrayaman norozi,
Yuz-ko'zlarim so'lg'indir.
Yakka-yolg'iz maydonda
Yurish chindan surgundir.
Shuncha molni boqsam-u,
Hech kim menga qarashmas.
O'ylasam, ish taqsimi
Yosh boshimga yarashmas.
Na yonimda suhbatdosh,
Na yonimda bir sherik.
Vozning uzun kunida
Zerikaman o'lgudek.
Qo'shni bolalar ko'proq
Uyida bo'lishadi.
Bir-ikki molni ular
Arqontab qo'yishadi.
Quyosh nuri jimirlar
«Jujak» degan partovda
Barmoq bo'yi qamishaq,
Yantoq bosgan yaylovda.
Podadan ajrab uzog,
O'tlasa, hu, «qing'irlar»,
Chopaman tikanzorda
Oyoq-yalang zing'irlab.
Pisandmas, tovonimda
Fikanlarning sinig'i.
Bilinmas saratonning
Jizg'inagi, issig'i.
Yo'lda, chetda tashlandiq,
Gazetaga duch kelib,
Hamsuhbat topdim, deymen,
Quvonaman kuch kelib.
Jumyoz doyim qattiqo'l,
Rangi-ro'yi sovugqon.
Mening ishim muhim-da,
Qiziqqani-qiziqqan.

Bir kun uyga mollarni
Keltirardim barvaqtrog,
Doim ko'rib do'q. urdi:
-Ortga qaytar, ey, ahmoq!
Quyosh tik kelsa, tush deb
Tush bo'lishin qo'msayman.
Kichraydimi soyam deb,
Har dam soyam o'ldayman.

XIII

Necha kundir maktabda
Shov-shuv chiqdi avjiga.
Quloqni ding tutamiz
Muallimlar gapiga:
-Kun tutilar falon kun,
Falon soat, qo'rqmanglar.
Tabiatta tabiiy
Bunday holat, qo'rqmanglar.
Qari-qartang kimsalar
Diyomat bu deyishar.
Diyonatni boy bermang,
Alomat bu, deyishar.
Aytilgan vaqt-soat ham
Yetib keldi, nihoyat.
Qalbimizni chulg'adi
Hayajon, shodlik g'oyat.
Boshga qo'yib oldik biz
Muallim yo't-yo'rig'in.
Dudga tutib oldik biz
Oynalarni sinig'in.
Hamamiz oyna uzra
Qarash bilan ovora.
Quyosh go'yo chodirga
Kirib borar tobora.
Ko'zlarimiz qamashmas,
Tik boqamiz bemalot.
Osmon bilan sirlashib
Ulg'ayar fikr, xayol.
Kemtik bo'lib, kichrayib
Fo'la tutildi quyosh.
-Kun botdi-ku, kun botdi!
Qichqirdik, soldik chuvvos.
Xo'rozlar ham qichqira-
Boshladi-ku, ajabo!

Kutdik quyosh to'siqdan
Chiqishini mahliyo.
Asta-asta jilmayib,
Ko'rinish berdi oftob.
Asta-asta «tong otib»,
Yorishaverdi atrof.
Mo'jiza, yangiliklar
Jasviriga berildim.
Qiziqib hamma fanga,
O'rganishga berildim.
O'qiyverdim zavq bilan
Qo'limga tushsa kitob.
O'qigan, bilgan sayin
Dilimda ortar shitob.
Endi men o'yifkrti,
Jumboqlarni yechgum bor.
Istasam, semurg'larning
Qanotida uchgim bor.
Endi menga hamrohdir
Go'ro'g'li, Albomishtar.
Barchinlar, Zulxumortlar
Iliq tuyg'u bag'ishlar.
O'zimcha suv, havo deb,
Osmon, deb pichirlayman
Eh, Vatanim-jonajon,
Posbon, deb pichirlayman.
She'r to'qiyman, ma'nolar
Izlash qanday nash'ali!
Bo'g'in sanab, qofiya
Jufflash qanday nash'ali!

XIV

Xudargan, Foji doim
O'tar harbiy xizmatin.
Nomin tildan qo'ymaymiz,
Tutib izzat-hurmatin.
Xat kelishin kutamiz
Xorijiy uzoq eldan.
Kelsa, qayerdan deymiz,
Rostovdanmi, Gomeldan?
Boshimiz ko'kka yetar,
Maktub kelsa, zo'r bayram.
Biri o'qir, eshitar

Xonadonda hamma jam.
Har kimga bir-bir salom...
Bu hammaga xush yoqar.
Karvon momo yig'laydi,
Ko'z yoshlari shashqator:
-Voy, mening bolalarim...
Holi ne kechar hozir.
Nochorgina yurgandir



O'zga yurtida musofir.
Fixirlik qilsak shunda
Bir nimani talashib.
Momom jerki b tashlaydi
Battar xunobi oshib:
-Yetim qo'zini boqsang,
Og'zi - burning moy bo'lar.
Yetim bola asrasang,
Ko'ngil ko'p bejo bo'lar.
Oyimjon, bolalaring
So'hjaytirma behuda.
Azobini tortasan,
Firjaytirma behuda.
Luqmalarni ko'pincha
Bizga qarab aytadi.
Ginasini unutib,
Shashtidan tez qaytadi.
Savodxon tutar o'zin
Uch yashar Ozod ukam.
Xat o'qib ber-chi, desak,
O'qiydi yolg'ondakam.
(Davomi bor).

(Davomi. Boshi o'tgan sonlarda).

Men uni doim
ko'nglimdagi ishni qilgani,
ko'nglimdagi gapni topib
gapirgani uchun yaxshi
ko'raman. Mana o'n yildirki,
bir partada o'tiramiz, ammo
biror marta «sen-men»ga
borganimiz yo'q.

Oramizda faylasufimiz shu.
Uning otasi ko'proq ruscha
gazetalarni o'qiydi va urush
xotiralaridan gapirib o'tiradi.
Umar ertasi kuni kelib undan
eshitganlari-yu kinoda
ko'rganlarini qo'shib-chatib
bizga hikoya qilib beradi. U
ruschani yaxshi biladi. Biror
oqshom kinoni kanda qilmaydi.
Lazarev uni «Etot general -
moy pomoshnik, filosof!» deb
maqtaydi. Darhaqiqat, u oddiy
ikir-chikirlarga ham jiddiy ko'z
bilan qaraydi, chuqur
mulohaza yuritadi, goho qildan
ham qiyiq chiqaradi, xullas,
jaydari faylasufning o'zginasi!

...Mana u - Turobadze!
Somsani yeb bitirgan shekilli,
odatdagidek, tanaffusga besh
daqqa qolganda huzurimizda
shay. Stoldan sinf jurnalini
olarkan:

- Uyog'ini o'zlaring kelishtirib
kelasizlar-da, a? Men sizlarga
bevosita ishonaman. Kimda
anovinaqa savoldan bor? - deydi.

Akbar «menda», - deydi.

- Xo'sh?

- O'rtoq muallim,
kommunizm ham matematika
bo'ladimi?

Sinfda kulgi ko'tariladi.

- Chto vi, konechno! - deydi
Turobadze iljayib. - Yana?

Umar o'rnidan turadi.

- Xo'sh?

- O'rtoq muallim,
Konstitutsiyada barcha
grajdanlar teng huquqli,
deyilgan-ku, nega Hojiqulov
hatto kinoga
kirishgayam...

- Qo'ying,

arzimaydi! - deya qo'l
siltaydi Turobadze va tik qomatini
tebrata-tebrata, bir-bir bosgancha
salobat bilan baland ko'k
eshikdan chiqib ketadi.

Men bu darsning sidqidildan
o'tilishini Risolatning she'riy
maktublarimga yurakdan javob
qaytarishiday istayman. Biroq,
afsuski...

Qo'ng'iroq chalinadi - dars
tugaydi...

...Kechirasiz, o'rtoq muallim!..

ASTRONOMIYA DARS

Qo'ng'iroq chalinadi - dars
boshlanadi...

KECHIRASIZ, O'RTOQ MUALLIM!

O'zi ham familiyasidek
darozi Hamroqulov
baland ko'k eshikdan
ikki bukilib, eran-
qaran kirib keladi.

Keladi-yu, stulga
yastanib olib, gazeta
o'qishga tushadi.

Bir ozdan so'ng,
dars berishi

kerakligini eslab,
sinfga loqayd

n a z a r
tashlaydi.

- Jalolov,

chiq doskaga! - deydi.

- Jalolov yo'q, - deb javob
beradi kimdir orqangi partadan.

- Nega? - deydi Hamroqulov
derazadan maktab hovlisiga
ko'z yugurtirib. - Nima, bu yer
akademiyami, xohlasa kelib,
xohlamasa kelmay... Bugun
pedkengashga shu masalani
qo'yaman!

Hayronsan: nima, uning o'zi
akademikmi? Haftada atigi bir

soatgina darsi bor-u, shunga ham
ba'zan kelsa, ba'zan... Uni kim,
kim pedkengashga qo'yarkan?..

Akbar «Shu ezma darsdan
ko'ra «Prima» yaxshi» deb,
maktab bog'iga ketgan.

Derazadan ko'rinib turibdi:
ikki qora - oldinda Turobadze,
orqasidan Nazokat opa bog'
tomon o'tadi. Bir gap bor asli...

Hamroqulov Bo'riyeva
degan qizdan o'tgan mavzuni
so'raydi, Bo'riyeva:

- O'rtoq muallim,
o'qimappan. Esimdan chiqibdi...

- deydi.

- O'tiring, - deydi
parishonxotir Hamroqulov, -
bahongiz «uch»!..

Undan keyin anchagina
javragan Qorayevga ham shuni
takrorlaydi:

- O'tiring, bahongiz «uch»!..

Hamroqulov zo'rg'a o'rnidan
qo'zg'alib, yangi mavzuni
tushuntira boshlaydi:

- ...Galaktikadagi osmoniy
jismlar sirti, - deydi u, - nimaday,
hozir, hozir... - deya so'z
topolmay qoladi. Uning tilidagini

Erkin A'zam

Umar aytib yuboradi:

- Salimovning kallasiday!..
- Vo-o! ...silliqlik emas! - deb
yakunlaydi o'qituvchi. Bizlarga
qo'shib o'zi ham iljayadi.

So'ng dars nasihatga
aylanib ketadi: «yulduz
turkumlari» bilan boshlangan
nutq «O-o-o, bizlar
o'quvchilimizda qandoq edig-
a!» «qo'shig'i» bilan tugaydi.

Bu darsni astronomiya
emas, nasihatnomiya deb atash
mumkin. Uni deyarli hech kim
eshitmaydi: hamma o'z xayoli
bilan band. Men biologiya
darsida o'qiyotgan kitobimni
qolgan joyidan davom
ettiraman...

Men bu darsni Risolatning
hijroniday cho'zilmasligini
istayman. Baxtinga...

So'nggi qo'ng'iroq
chalinadi - dars tugaydi...

Kechirasiz, o'rtoq
muallim!..

(Davomi bor).

YAXSHI ANDOZA BO'LAYLIK

Og'usiz - hayot sari

Men boshlang'ich sinf o'qituvchisiman. Biz ustozlarni bejiz «kishi ruhiyatining muhandisi» deyishmaydi. Chunki biz o'quvchilarga ta'lim-tarbiya

beribgina qolmay, ular ruhiyatini o'rganishga, xatti-harakatlarini kuzatib borishga intilamiz. Bu narsa har bir bola qalbiga yo'l topa olishimizda juda qo'l keladi.

Yaqinda bir o'quvchimning tug'ilgan kunini nishonladik. Dasturxonga shirinliklar, salqin ichimliklar tortildi. Ayrim bolalarning stakanga quyilgan ichimlikni bir-birlari bilan urishtirib ichishayotganini, ichib bo'lgach esa, xuddi achchiq narsani iste'mol qilgan odamdek, aftlarini burishtirib «ux»lab qo'yishlarini ko'rib juda ajablandim. Bu ham kamlik qilgandek qog'ozdan yasalgan «sigareta»ni lablariga qistirib olib, xuddi chekayotgan

odamdek turishardi. Gap-so'zlariga quloq solsam, dadalarining qanday sigaret chekishi-yu, aroqning «toz»-sidan ichishi haqida suhbatlashishardi. Ularning fe'l-atvoridagi bunday holatlar albatta oiladagi tarbiyaga borib taqaladi. Demak, ana shu bolalar kamol topayotgan oilada kattalar ichishadi, chekishadi va o'z farzandlariga «namuna» bo'lishadi. Shunday muhitda ulg'aygan bolakaylar kattalarga taqlid qilib, bu salbiy illatlarni o'zlariga odat qilib olmasliklariga kim kafolat bera oladi?!

Istardimki, bolajonlarimiz suhbatining mavzusi ota-onasining qaysi sport turi bilan shug'ullanishi, mahallada o'tkazilgan sport musobaqalari haqida bo'lsa. Ota-onalaridan

eshitgan ichish va chekishning zarari haqidagi hikoyalarini do'stlariga ham so'zlab berishsa. Har bir insonning salomatligi o'z qo'lida ekanligini anglab yetishsa. Shundagina ular sog'lom va baquvvat bo'lib kamol topishadi. Buning uchun esa faqat biz ustozlarning sa'y-harakatlarimiz kamlik qiladi. Axir «Qush uyasida ko'rganini qiladi» deb bejiz aytilmagan-ku. Ota-onalarimiz farzandlari har sohada ulardan andoza olishlarini unutib qo'yishmasa, yaxshi bo'lardi.

Keling, har birimiz farzandlarimizga yaxshi andoza bo'laylik.

Naima ZIYAYEVA,
Toshkent shahar,
Sobir Rahimov tumanidagi
249 - maktab o'qituvchisi.



UMRIMIZ KUSHANDASI

Maktabimizning ko'zdan panaroq yerlarida chekib turgan tengdoshlarimni ko'rsam, xafa bo'lib ketaman. Aytishlaricha, biror narsadan qattiq siqilgan, boshiga og'ir musibat, tashyish tushgan odamlar chekib, yengil tortisharmish. Xo'sh, bu o'smir bolalarni hozirdanoq chekishga nima majbur qilyapti? Menimcha, hech nima. Ular shunchaki o'rtoqlariga, qizlarga maqtanish uchungina chekadilar. To'g'ri, ular hozir shunchaki havas uchun chekishadi. Lekin bu odatga o'rganib qolganlaridan keyin undan qanday qutulishni bilolmay yurishadi. Chekishning inson salomatligi kushandasi ekanligini ular nahotki bilishmasa?! Hozirdanoq chekishga odatlangan bola ertaga giyohvandlik

Munira HIKMATOVA,
Buxoro viloyati, G'ijduvon tumanidagi 30-maktab o'quvchisi.

moddalarini ham tatib ko'rmaydi, deb kim ayta oladi?..

To'g'ri, ustozlarimiz ularga ko'p nasihat qilishadi. Ammo bu gaplar bir quloqlaridan kirib, ikkinchisidan chiqib ketaveradi. Menimcha, ularning ota-onalari ham farzandlariga e'tiborliroq bo'lishlari, tushlik uchun berayotgan pullarini nimalarga ishlatayotganlarini nazorat qilib turishlari lozim.

Shifokorlarning tahliliga ko'ra, Ita sigareta insonning 4 soatlik umrini qisqartirar ekan. Bu asosli ma'lumotlarni barcha chekuvchi bolalar bilib qo'yishsa, yomon bo'lmasdi.



«O'G'IL BOLA» BO'LGAN KUNIM

To'g'risini aytsam, o'rtoqlarimga qo'shilishga yuragim betlamay qolgan. Chunki oralarida boshlovchi chekuvchilar ham, 3-4 yillik tajribaga ega kashandalar ham topiladi. Biroz gaplashib o'tiray, deb yonlariga borsam bas, sen ham bir chekib ko'rgin, deya qistayverishadi. «O'zlaring chekaveringlar, men bilan nima ishlaring bor» deya e'tiroz bildirardim. Tunov kuni bir bolaning ta'nasi suyak-suyagimdan o'tib ketdi: «O'g'il bolamisan o'zing, yo onasining erka qizimisan?...» Bu gapdan keyin qanday qilib qo'lidan sigaretni tortib olib, chekib yuborganimni bilmay qolibman. Ko'zlarim yoshlanib, o'qchib yubordim. Bolalar miriqib ustimdan kulishdi. Men sir boy bermaslikka harakat qilib, yana bir marta chuqur tortdim. Nafas yo'limga tutun ketib qoldimi, qattiq yo'tal tuta boshladi. Boshim

aylanib, bir amallab uyga yetib keldim. Ahvolimni ko'rgan oyimning ranjiganlarini bir ko'rsangiz edi. Bo'lgan voqeani aytib berishga majbur bo'ldim. Shunda oyim menga yoshlikdagi bir voqeani so'zlab berdilar.

Karim ismli bir sinfdoshlari bo'lgan ekan. O'zi juda iqtidorli, a'lochi bola ekan. Nimagadir tengqurlari bilan emas, o'zidan ancha katta yoshdagi bolalar bilan birga yurarkan. Shularning ta'siri bo'ldimi, Karim 3-sinfda o'qib yurgan chog'laridan oq chekishni boshlab yuboribdi...

Oradan yillar o'tibdi. Maktabni tamomlab, turli tarafga tarqab ketishibdi.

Bundan ikki yil avval sinfdoshlar uchrashuvini tashkillashibdi. Shunda oyim Karimni taniyolmay qolibdilar. Ozib-to'zib,

ranglari ketib qolganmish. Biroz bukhayibroq yurarmish. Ma'lum bo'lishicha, Karim oliy o'quv yurtini ham qizil diplom bilan muvaffaqiyatli tamomlabdi va katta bir korxonaga ishga kiribdi. Mehnatkashligi-yu aql-zakovati bilan oradan hech fursat o'tmay ana shu korxonaga rahbar bo'libdi. Lekin u yerda uzoq ishlolmabdi, salomatligi ko'tarmabdi. Shifokorlarning fikricha, uzoq yillar davomida chekib kelganligi uchun shifosiz dardga yo'liqqan ekan. Yoshgina bo'la turib, nogironlik nafaqasiga chiqishga majbur bo'libdi. Bu ham yetmagandek, oilasi bilan ajralishiga to'g'ri kelibdi. Keyinchalik giyohvandlik moddalari iste'mol qilgani uchun allaqaysi shifoxonada yotib, davolanib ham chiqqanmish...

-Men senga bu noxush voqeani bejiz gapirib berganim yo'q. Undan to'g'ri xulosa chiqarib olishingni va do'stlaringga ham so'zlab berishingni istardim, -deya so'zlarini yakunladilar oyim.

Furqat NISHONOV,
Andijon viloyati, Baliqchi tumani.



TONG yulduzi

O'zbekiston Respublikasi
bolalari va
o'smirlarining gazetasi

BOSH MUHARRIR:
Umida
ABDUAZIMOVA

TAHRIR HAY'ATI:
Turobjon JO'RAYEV,
Shuhrat AHMEDOV,
Botir UBAYDULLAYEV,
Jabbor RAZZOQOV,
Feruza JALILOVA
(Bosh muharrir
o'rinbosari),
Abdusaid KO'CHIMOV,
Nurxon NAFASOV,
Ergashvoy SARIQOV.

Gazeta O'zbekiston
Matbuot va axborot
agentligida
022- raqam bilan
2003 yil 11 dekabrda
ro'yxatdan o'tgan.

Noshir
«O'zbekiston»
nashriyot-matbaa
ijodiy uyi.
Gazeta
«O'zbekiston»
nashriyot-matbaa
ijodiy uyi
kompyuter bo'limida terib
sahifalandi va
chop etildi.
Gazeta haftaning dushanba
kuni chiqadi.
Hajmi A-3,
2 bosma taboq.
Adadi - 50 264
Buyurtma N: J 1118

Dizayner va sahifalovchi:
**Otabek
ESHCHANOV.**
Navbatchi:
**Ozoda
TURSUNBOYEVA.**

Rassom:
Nodira MIRZAYEVA.

Manzilimiz:
700129,
Toshkent shahri,
Navoiy ko'chasi, 30-uy.
Obuna indeksi: 198.
e-mail:
tong_yulduzi@rambler.ru

Tel: 144-10-38
144-38-10
144-63-08
Tel./faks:
(99871) 144-24-45